





# Snow White





# Snow White



**Penerbitan Pelangi Sdn. Bhd.**



Pada zaman dahulu, seorang permaisuri melahirkan seorang bayi yang sangat comel. Rambutnya hitam berkilat, kulitnya putih melepak, dan bibirnya merah delima.

“Kulitnya seputih salji,” kata permaisuri. “Beta akan namakannya Snow White (si putih salji).”

Tidak lama selepas melahirkan Snow White, permaisuri jatuh sakit lalu meninggal dunia.








Beberapa tahun kemudian, raja negeri itu berkahwin dengan seorang puteri yang cantik. Raja tidak mengetahui bahawa permaisuri barunya itu seorang ahli sihir.

Permaisuri seorang yang bongkak dan sombong. Dia mempunyai sebuah cermin ajaib. Permaisuri meletakkan cermin itu di dalam sebuah bilik rahsia.







Setiap pagi, permaisuri akan berkata kepada cermin ajaibnya.


“Wahai cermin sakti, siapakah yang paling cantik di negeri ini?”

Cermin itu kemudian bersuara.

“Permaisurilah yang paling cantik!”

Permaisuri berasa sangat gembira.  
Dia semakin bongkak dan sombong.










Beberapa tahun kemudian, raja meninggal dunia. Tinggallah Snow White bersama-sama dengan ibu tirinya. Hari demi hari berlalu. Snow White semakin dewasa dan bertambah cantik. Permaisuri mulai berasa cemburu.

Pada suatu hari, permaisuri bertanya kepada cermin saktinya. “Wahai cermin sakti, siapakah yang paling cantik di negeri ini?”

“Snow Whitelah yang paling cantik!” jawab cermin itu. Permaisuri mulai berang.





Permaisuri memanggil pengawalnya.  
“Beta mahu kamu bunuh Snow White,”  
perintah permaisuri.

Keesokan harinya, pengawal  
membawa Snow White ke dalam hutan.  
Namun, dia tidak sampai hati hendak  
membunuh Snow White. Dia kemudian  
menceritakan perkara yang sebenar  
kepada Snow White.

“Larilah selamatkan diri dan jangan  
kembali lagi ke istana,” kata pengawal itu  
kepada Snow White.







Snow White pun berlari meninggalkan tempat itu. Beberapa lama kemudian, Snow White tiba di sebuah pondok di tengah-tengah hutan. Pondok itu didiami oleh tujuh orang kerdil.

“Nama saya Snow White. Bolehkah saya tinggal di sini?” tanya Snow White.

Ketujuh-tujuh orang kerdil itu sangat hairan. Mereka tidak pernah melihat perempuan secantik Snow White.









“Siapa kamu?” tanya orang kerdil.

“Bagaimana kamu boleh sampai di sini?”

Snow White pun menceritakan apa yang berlaku kepada orang-orang kerdil itu.

“Kasihan!” kata mereka. “Tinggallah bersama-sama kami di sini.”

Snow White pun tinggal bersama-sama orang kerdil. Setiap hari, Snow White melakukan semua kerja rumah sementara orang kerdil keluar bekerja.





Permaisuri sangat gembira apabila diberitahu oleh pengawal bahawa Snow White telah dibunuh.

Dia kemudian bertanya kepada cermin ajaib. Permaisuri sangat terkejut apabila cermin ajaibnya menjawab, “Snow Whitelah yang paling cantik!”

Permaisuri sangat berang. “Beta akan bunuh Snow White sendiri!”

Permaisuri membuat sebiji epal beracun. Dia menukar dirinya menjadi perempuan tua dan pergi ke pondok orang kerdil.







“Gadis cantik, kamu hendak membeli epal?” tanya perempuan tua kepada Snow White. Ketika itu, orang kerdil tiada di rumah kerana keluar bekerja. “Nah, cubalah rasa epal ini,” kata perempuan tua lagi.

Snow White pun memakan epal tersebut. Dengan serta-merta, Snow White rebah ke lantai.

“Ha, ha, ha! Mati juga kamu akhirnya,” kata perempuan tua itu. Dia kemudian kembali ke istana.









Apabila orang kerdil pulang, mereka mendapati Snow White terbaring di lantai dalam keadaan tidak bernyawa. Orang kerdil berasa sangat sedih. Mereka menyangka Snow White telah mati.

Mereka pun meletakkan Snow White di dalam sebuah keranda kaca supaya mereka dapat sentiasa melihat Snow White.





Seorang putera raja datang ke tempat itu. Dia hairan melihat Snow White berada di dalam keranda kaca. Orang kerdil pun menceritakan apa yang berlaku kepada putera itu.

Putera mencium Snow White.

Tiba-tiba, Snow White membuka matanya. Rupa-rupanya Snow White tidak mati. Dia hanya tidak sedarkan diri.

Putera pun membawa Snow White ke istananya yang terletak jauh dari negeri itu. Mereka berkahwin dan hidup bahagia.





**A** Imbas kembali.

1. Mengapakah permaisuri memberi nama Snow White kepada puterinya?
2. Adakah permaisuri yang baru sayang akan Snow White?
3. Siapakah yang diperintahkan untuk membunuh Snow White?
4. Berapa orang kerdilkah yang ditemui oleh Snow White?
5. Bagaimanakah Snow White boleh tidak sedarkan diri?

**B** Dapatkah kamu membaca perkataan-perkataan ini?

CANTIK

PERMAISURI

ISTANA

EPAL

PUTERA

Pegang halaman ini di hadapan cermin. Sekarang, dapatkah kamu membaca perkataan tersebut?